

四庫全書

集部

欽定四庫全書

集部

漫塘集卷三
四

詳校官庶吉士 臣翁樹培

主事 臣呂雲棟覆勘

總校官原任中允 臣王燕緒

校對官助教 臣蔡鎮

謄錄監生 臣戴天民

欽定四庫全書

漫塘集卷三

宋 劉宰 撰

長篇詩上

儀真呈友人

近聞李郭舟送往涉重湖我欲與之俱鷁飛過宋都死
生見交情嗟我失東隅歸來整杖屨顏厚見彼妹念昔
擔簦日籃縷出無襦公子載與歸樽酒日相娛所愧身
為客如彼繞樹烏食苹鹿在野呦呦呼其鷹鴻鴈稽來

書提壺空勸沽輸君山中行梅梢嗅紫萸又有好事人
開宴勤招呼翻然棄舟楫躍馬問長途嗟我困行役勝
遊那能覩方今神聖君南風歌有虞所須賢與能搜羅
遍八區公等梁棟姿咳唾玉與珠尚從山澤遊此理良
可吁翻思六月息豈即非南圖料公賜環日禍轉當亡
胡願借尚方劍先斬張禹顱小子雖不敏敢效一得愚

章倉席上

官舍若幽居四圍山水綠中有超詣士簿書厭拘束避

迺文字飲交契如金玉朱絃發清音紋楸理新局一盃
復一盃夜闌更秉燭木落天宇寬蟹肥酒初熟相期壯
觀游憑高重送目勿令兒曹知此味我所獨

東陽道旁涵碧亭

四山委蒼翠一沼湛清漣雲飛松竹留石墮藤蘿牽泉
音亂絲竹鳥語賡笑言斯亭作者誰俛仰四百年棟宇
有興廢篇章足流傳官道紛往來此地曠周旋乃知造
物意以遺靜者便我來早暎餘龜兆坵平田攀崖遡源

委石竇鳴涓涓摩挲兩石魚變化定何年

謝烏鵲

朝來不成寢啼烏繞西東似欲砭我愚無虞終有凶挽
衣行太息飛鳴鵲當空似欲慰我心正直神所容舉手
謝烏鵲憂喜當何從吉凶兩不到我在阿堵中

訪陳廷瑞有感

閒維有常度曜靈無停輶翩翩葉辭柯過眼綠已稠弱
榦不盈尺忽已高岑樓念昔過庭日朋來悉良儔我年

未成童子少無與侔我質本駑駘蹇步畏阻脩子如渥
注駒猛氣已食牛當時二老人笑語懽且酬門戶各有
托寧計才與不登門如昨日星紀踰再周二老安在哉
體魄歸山丘隔屋聞讀書玉樹鏘琳球呼燈使來前秀
氣炯雙眸問之垂九齡屬對解冥搜感此傷我心淚下
不可收來者日已長逝者挽不留其間我與子能閱幾
春秋寧復青衿佩與子從親游幸子齒猶壯有母方白
頭刷翮凌青霄足勝負米由而我風樹悲耿耿何時休

四十已無聞過是夫何求矧復病日侵見面良可羞竹
實不療饑芟製非寒裘躬耕苦勤勞代耕多悔尤學仙
竟誰成百年等浮漚俛仰天地間身世真悠悠時雨漲
綠池好風交平疇嚶嚶出谷鳥汎汎川上鷗遇景適會
心曠望聊夷猶

懷茅山寄句容江大夫

昔謁三茅君蹇步窮躋攀是時秋已高爽氣薄千山三
峯斂神秀突兀超塵寰世變逮狂秦風俗如髦蠻舌在

不敢語冥默疑心訕咸陽貴公卿高門擁旗旛牽犬上
蔡門回首涕空潛積骸草木腥流血川原殷所以三君
子決去披榛菅不以寸草榮易我白日閒徘徊茲山巔
放蕩紫翠間數窮會有歸山空水潺潺高風起遐想往
躅芬芝蘭想此弄明月想此發清彈茲壇梯玉京茲臺
凝金丹羣仙或朋來洞戶敞幽闕縹緲鈞天奏依約雲
旗翻古澗會流泉點筆依石闌遺墨墮中流染此亂石
黓世情喜虛誕詎記誰能剛峭壁起道邊雨濕苔蘚斑

剝蘚訪舊題歲月猶班班當時往來人逸翮超籠樊應
期後千載綠鬢炯朱顏御風游汗漫騎鯨出頽瀾或乘
白鶴歸翩躚從妖嬈寥寥竟誰成遺蹟空浩歎愚生百
世下逐妄笑冥頑幽尋昔未極雲卧衣裳單杖屨陟層
嶽此懷今未闌矧聞廊廟議出師銳除殘將軍賈餘勇
弭節期白檀已覺賦斂頻更恐戍役煩聖主哀元元絡
繹寬詔頒官守孤王明根節滋吏姦擬追三君游物表
寄衰孱彼美江夫子拊字周惇瘵寧甘催科拙不使朽

袖彈坐令句曲天忘此世道艱儻許占一丘結廬樹牆
藩渴飲玉井泉饑挹朝霞餐永無垂老別寧憂行路難
寄書新過鴈一諾未應慳

松風軒晚望

遠山亞歸雲近山留夕照澄江橫淨練怒風收衆竅東
南佳山水此地宅其要連甍三萬家金壁互輝耀閒房
列歌舞傑觀富登眺物理會有極却慮成悲嘯我家三
茅峯一室倚青峭下有荆溪水水深魚可釣歸歟有成

計靜坐觀衆妙功名付公等連茹祇明詔他年問無恙
短策寄嶺嶠浩歌暢幽懷狂斐君勿誚

漫塘晚望

遠山亞歸雲黯淡與天一近山過餘雨淨掃峯已出式
喜鳩喚婦寧憂月離畢擔簷彼誰子蹇步泥沒膝舉頭
望天末一笑失愁疾應知扶桑東明朝浴晴日

漫塘觀雪分韻得遠字

入臘甫自茲得雪殊不晚凝寒祛厲氣積潤滋麥本清

興浩無極步履忘足蹇扣門呼石交頸縮語猶蹇挾攜
事登眺南去還北反所向游目礙窘若虎就圈歸來漫
塘上四望與天遠蓑重漁舟歸煙橫樵舍飯稜層啟瑤
池燦爛開瓊苑玉龍擁寒城銀海迷疊巘頗喜漫翁貧
覽富逾北阮呼兒具杯酌採掇飜蔬畹不辭多酌我自
愧飲河鷄少焉斂夕氛桂魄爭婉婉翻思造化工舒卷
意難忖方其陰風壯一噫萬象偃聚將藪澤平散欲天
壤混端疑冰山固可但拳石狼及其遂離析去去不可

挽日月麗太清草木被餘煖區分鏡出匣渙散渠決堰
向來天壤間了不計增損呼吸一氣爾人當解茲悃恭
惟聖明君憂民中繼繼方冬祈瑞應此足慰勤懇貴瑞
不貴多真宰亦知搏公等調元手聖世須補衮未應事
閒曠崖壑慣棲遯我智拙於鳩一枝聊自穩但喜占豐
年努力務耕墾

崇禎夜坐

以五士三不同
為韻得士字

淮浙千萬山茲山鍾秀異山中四時好雪景更佳耳危

登俯八荒豈無超詣士
春游眩紅紫秋賞挹蒼翠
衝寒繚冰崖問訊世能幾
山神出奇觀似慰遠來意
漫空飛六花匝地掩蕪穢
頗疑羣王府飄墮人間世
又疑姑射僊與物洗疵癘
意行輒有得曠望了無際
便欲呼雲車御風駕六氣
舉酒酌初平逍遙聊卒歲

簡張槃齋以國朝四君子文易南華經

我宋百年間人物兩漢上
堂堂司馬公與學邁舒向
廬陵祖韓孟首以六經唱
升堂子曾子功亦孟氏抗
荆舒

徇偏見晚拂天下望斯文價金玉表表足相尚一編誰
纂聚百世得宗匠晴窻一開卷璀璨羅萬象餘功墮毫
穎雲煙起千嶂老我憂患餘苦學殊少壯適越資章甫
篋笥增冗長之子秀儒林筆力錦江浪九原如可作四
子推輩行殷勤特送似或可起遺忘漆園有傲吏所樂
在閒曠挿架有全書引領祈拜貺所志逍遙游不受鷗
鵬誑他年子奮飛榮問日休暢濠梁如有意回首問無
恙

宿雲邊感懷

虛館怯朝寒幽夢不可續
展轉復展轉萬感起心曲
世塗嗟杳鑿親養悲風木
悔往古噬臍念來弓擬鵠
悠悠穹壤間方寸浪馳逐
西山有仙子曾次湛寒玉
何年白鶴歸就我雲邊宿
挽衣起凝睇飛鷗下平綠

東禪百韻

羣居厭囂煩兀坐悵離索
動靜兩何心求端僕先覺
張氏好兄弟同游得先諾
重以臨邛客雍容出蓮幕
二難

秀金枝高會因酬酢客來驚醉夢倒屣出簾箔符子方
下帷訓子傳家學湯子方涉筆詞賦工雕斲閉門各有
適楚然聞剝啄錢君夫人行邂逅同出郭衝颺翼飛蓋
宿潤沾芒屨是日皆以
帚篋出山僧迎戶外蕭散出林鶴升堂

忽起敬先正事超卓於今國猶活繫爾盡忠恪禪房燈
火暗遺像丹青落惟餘我輩人往事記其略緬懷百年
後賢愚一丘貉風爐催煮茗曾次澆磊落開軒一凝睇
偉觀奪巖壑古木矯龍蛇藤蘿喧鳥雀亭亭塔前竹左

右森矛稍老幹欲摩空穉綠猶含籜微風度疎櫺萬竅
呈笙籥鼎來聞歌呼冠帶亦褒博汝豈陳孟公四坐為
驚愕禍福寧所知字畫妄穿鑿俳優時所拙掀髯資一
噱山僧如有意太息事殊昨衆真擁靈君昨夢非冥漠
人情良易感意氣隨飄泊焉知宋玉賦浪費屠門嚼朝
雲無定姿密意終難托棄置勿重陳聲色等臭惡觴行
奉壺矢尚想古樂樂園碁對空枰白日忽飛電勢成秦
始大計誤魯日削將士兒戲爾迴旋守宮鑰車馬或殆

煩俘敵到幃幄張奉合奇偶奮臂幾攫搏嘉名襲百子
覆射師方朔數窮或自蹈世事真難度情性漸浩浩典
義相磨琢壽夭徵彭殤小大稽鵬鷺天高何所懸地厚
何所著孰怒而雷震孰笑而電爍興王悼筮獨季世慘
炮烙道隆此何幸道降此何薄生乎誰汝思逝矣誰汝
虐毫釐有必爭司馬振鏡鐳義正誓不屈勇士赴鼎鑊
少焉兩忘言水淨潛鱗灼行樂未有極暮霞橫日脚催
歸走童隸欲去仍復却顧瞻忽有念鬱悒忘諧謔鑿井

成先志結甃石鑿鑿危亭俯達道棟宇更旁拓北牖瞰
清渠西軒粲花藥借問彼何營游手事蒲籜荆簪田家
婦羣居勇奔躍有問不能對彼豈棄耕穫似言歲苦饑
貨鬻逮錢鏹多謝賢令君惻怛憂民瘼精誠徹高厚一
雨洗炎熯種藝貴及時少稽溝澮涸丁錢曾幾何秋苗
遺合勺牌追甚星火胥吏踰毒蠱或云勾稽職久矣廢
矩矱催科苦重疊受害徧貧弱丁壯腹難朽努力重鋤
穫老婦徒跣去詎敢辭答掠暮歸已戴星晨出雞咿喔

疾行君勿嗤寸步千里邈吾聞古哲王重本抑末作豈
其倚市門餘財暨丹雘而此力田民往往困椎剝令君
誠昭昭忠告期諤諤念此久忘歸露濡襟袖溼餘香來
佛殿幽響動簷鐸空庭炳雙燭木末翻烏鵲清興浩無
涯洗盞復更酌殘盃屏督郵珍送來絲絡茲懽誠有餘
茲會歎難數別駕人中仙精爽排秋鶚六年脫曹尉緹
車佐方嶽少須尺一詔歸持紫荷橐堂堂蒲圻掾少學
鄙衛霍棲遲縮黃綬百鍊斂鋒鏑踞鞍尚堪行投筆清

河洛含山控邊陲壯志方躑躑將策殊勲恩光輝棣
萼粹然六君子總抱荆山璞或登賢能書拏雲出頭角
或游王侯間健筆驅蛟螭或欲振家聲塵言東高閣行
矣拔連茹大廷副親擢誰其戀鄉邑株守甘齷齪惟予
與世違自分同尺蠖他時一樽酒重赴山僧約

和丹陽徐文度令君

微生嘆數竒衰疾久見面遙聞鄉大夫今日潘懷縣列
宿羅胷中可但書萬卷撫字究衷曲誅求無俗見已多

鍾子知且上北海薦顧以疾自歎往見身如絆緬想滄
浪臺吏退足清燕詩壇建旗鼓來往紛俊彥未修維梓
敬徒起臨淵羨邂逅得披承英風起衰懦覲顏謝不敏
多言幾誕謾歸來飭泓穎秋暑尚嚴憚居然得新詩大
篇驚趣辦瑟縮綴苦語緘題寄回便何當重扣門一奏
白石祭

送友人歸茅山

峩峩三茅峯秀出雲雨上疑有避世士卜築便幽曠菊

英當朝餐蘭佩拂千障我行未之見徘徊幾惆悵子居
山之西昔聞今見之厭和下里曲浩歌商山芝山林久
寂寥遲子相發揮間闕整車軸萬里端自茲特苗天所
托念此令人悲毋為舍靈龜旁觀時朶頤

因石令君

不矜

行有感成古詩一章呈丞尉二

夫不知退之亦肯效孟郊樊宗師以文滑稽
否

絕代有佳人潔齊處深宮組織成文章黼黻可帝躬蘭

菊媚幽姿桃李自春風出門非所識所識非所從婉孌
彼誰女剪製了不工膏沐倚市門苟為悅已容顧盼若
有得芻雉靡不同出門惟所之諧笑繚西東寄語道傍
人取舍須至公榮華一時耳禮義百年中

和李果州道傳同遊茅山贈

我家荆溪東矮屋八九間石田人不耕自占水一灣十
年去城市樂此清晝閒飽聞西州英輿學窺孔顏見賢
豈無時水開水潺潺竭來潔齊俟一語開冥頑錦機神

所祕啟示不吾慳追隨妙高臺勇往不作艱蹇步驅弗
前逸駕香難攀惆悵默無言詩卷慙空還三茅在何許
天末聳髻鬢勝處不可窮老我嘗窺斑幽人去不歸夜
鶴守松闕夫君金玉姿秀氣超人寰興來得同遊句就
知難刪應同太史筆有副藏名山

喜客泉

物我未忘情無情惟止水底事山中泉客來如有喜悠
然鏡面平倏爾魚眼生少焉開笑面似與客逢迎客喜

泉豈知泉笑客何有邂逅深山中聊結無情友

夜夢續句

乙丑四月四夜夢中得句云昏旦視生死又云不種
桃與李覺坐而思豈吾壽不延歟因就枕上足而成
詩既以自悟亦以自遣云

大化賦羣有脩短亦天只彭殤誰得失鵬鷗均適已我
今識其然昏旦視生死青青竹籬下不種桃與李老蒼
怙春柔叢蒿薦芳旨耘耔藉人力四時自終始屬饗幸

朝夕過計胡為爾勿笑趙孟偷甚矣吾衰矣

喜雨柬權邑蔡丞

高槐障午暑巨竹搖清風中郎百世英一官此從容心
事付盟鷗年光占候蟲客來欲有言一笑撫雙松曰余
不負丞哦詩有新工天意亦憐才要施及物功適此歲
薦饑旱氣日蘊隆雨應長官祈猶未周四封鴈鷺抱文
書朋來立庭中公曰早既甚此理貴感通潔齊走羣望
精意格蒼穹西山殷其雷萬疊聳雲峯南湖飛霹靂彷彿

佛追蛟龍斯須天壤間萬象俱晦蒙飛湍連日夜一洗
旱魃空樹藝走丁壯謹呼沸兒童歲功已權輿餘閒清
鋤筍行歌何所云丞哉寧負公

代東寄當塗大夫王去非

聞道王明府仁聲已四傳催科能不擾賦入自爭先理
到頑民服仁漸黠吏悛俊良搜士類疾苦訪氓編義役
頒成制巫風變昔年已聞銷珥筆直欲弛蒲鞭未可徒
寬治還疑執德偏碧雲江外合愛助正奉拳

謝諸友移具游德及亭

老去疎文會朋來愜素心結廬慙遠引挈榼荷親臨反
旆孤成約臨池得勝尋鳥飛青嶂遠魚戲碧波深揮麈
荷香度開樽柳色侵已欣年游稔猶冀雨為霖學道心
無得為農力不任每因情款款常恐歲駸駸坐久便徐
步觴頻怯滿斟非因苦衰疾豈憚豁煩襟羈旅忘家食
辛勤念子衿範模資伯父燈火惜分陰一第均兒戲微
言久陸沈簞瓢誠有味山水會知音子事增吾感吾言

豈子歲他年黃鵠舉莫忘候蟲吟

送李秀崑歸蜀

平生秀崑翁嘉遯輕朝衣聖世重特招趣駕不容違我
豈匏瓜哉先聖固所睇長江一萬里舟行疾如飛東南
盛人物十九飫甘肥頗藉子公力寧知伯玉非秀崑曰
異哉我本起布韋豈比淮之水東下雜於泚論奏了不
阿正直鬼神依讒言嗟止棘曰歸詠采薇歲晏江濤平
雨雪從霏微懸知到家日花竹遶山扉

趣劉倅聖與建第

鷓鴣巢枝寬大鵬溟海窄不齊物之情大小貴安宅一
區揚子雲衡宇陶彭澤何妨輪鞅稀所憎塵市迫吾宗
攜家來寒暑已屢革寓舍得賈區開門即廣陌四鄰共
壁立而無藩牆隔晝通燔炙芬夜悉笑語啞腐至窘賓
朋雨立愧臧獲傳聞三徑地經始得長策良材蔽川下
賤售非難索露廩發陳積香飯流匙白羣工闔戶外拱
手聽規畫願速大厦成却展搏風翮

送胡伯量

我本山澤人飄然如野鶴夫君九臯來氣類頗相若相
逢宿不再別去天一角君從浮丘游度世得良藥渴飲
瑤池水饑向芝田啄引脰試一鳴羣僊相唯諾嗟余侶
鷗鷺迴翔一丘壑刺天見羣飛老氣鼓不作客來傳好
音重會欣有約追隨忽幾月至哉天下樂亦知僊凡異
所向終落落分飛又茲始後會杳難度歸從浮丘侶為
我試商略雖愧毛骨凡頗亦志念慙願乞刀圭劑一洗

性昏濁從君清都游共聽鈞天樂

次聖與小兒啖虎脯篇

折臂最小兒骨聳顙微廣弗說螺螄小可以吞大象那
敢謂其然且幸日稍長顧似陶家郎智識殊不與強令
侍師席跳踉繞函丈胡能辨滋味舍魚取熊掌但見蔬
果列攫取如技癢嘉餽得虎臠新獵出林莽對之懶下
箸殺氣猶可想呼兒食之既睥睨尚來往饕餮我所羞
跌蕩或稱賞服猛豈渠能過獎謝吾黨深慙如敝帚有

誤千金享

走筆謝王去非遣餽江鱈

環坐正無惊，駢頭得嘉餽。鮮明訝銀尺，廉纖非薑尾。肩
聳乍驚雷，腮紅新出水。毛以薑桂椒未熟，香浮鼻河鮓。
愧有毒江鱸，慙寡味更咨。座上客送歸，煩玉指釘餽雜。
青紅百巧出，刀匕翩翩鶴來翔。粲粲花呈媚，頗疑壺中
景。髣髴具盤底，又疑三神山。幻化出人世，更於屬饜餘。
想像無窮意，知君束裝兒。不敢折簡致厚賜，何可忘因。

筆聊舉似

再韻為鱗繪虎鬻解嘲

多病早休官自是臺無餽東門享鷄鴟寧若龜曳尾有
酒可斟酌有力給薪水朗詠淵明詩如斲郢人鼻所期
免朝饑敢幸嘗異味大哉來隣邑細縷出纖指一見喜
折屐三思食失匕珍非我可常竈非吾敢媚胡可狗口
腹有若囊無底諸君有用學士苴足經世龍肝與鳳髓
何求不適意此豈費萬錢正自不難致貴賤理則殊氣

味固相似

次劉聖與遊土山韻

巨浸邑東南西北起培塿意恐七澤馘遺此鎮其後我
來雪霜降陽和開歲首平波十萬頃如鏡照妍醜尚想
雷霆擊水立蛟龍走微此一抔土羣生魚鱉久山人豈
解此采掇競薪樵是日有爭採薪者飛香識早梅柴門深處有攀
條情正濃催歸回鷁首幽懷殊未愜陶寫賴詩友春事
甫權輿重來多載酒會有不速客帶索老榮叟

分韻送王去非之官山陰得再字

達官須親民未竟法應再昔君治姑孰報政甫初載桃
李春正華風木養不待至今田里間往往誦遺愛薦章
交公車夷塗了無礙自說更治民得邑仍勇退坐看積
薪上笑謝及瓜代赤縣官山陰銅章喜重佩平湖帶城
郭崇山鎮溟海道中勤顧接何者非勝槩鷺池湛清漣
蘭亭霏翠靄溪流西走剡夜雪曾訪戴此地君故家舊
游詳往載公餘信足樂俗敝良可慨盜賊人鬪狠淫祀

家襍禮緩縱固不可激之或生害厥田惟中中厥賦上
上倍豪家窘輸送勺合無容貸貧家慣逋負符移費追
逮行之苟失中上下交怨懟臺府相鼎立征求常意外
稽違速譴呵抑絕虞冒昧犴獄當盡心夜寄或百輩去
來不敢詰猶豫即招悔譁徒陷平民更欲脫有鼻朝方
得其情莫祈當路改過客紛如織刺口說行在丐求小
不愜百計工組續我知夫子心此去專勞來豈其懾聲
勢左盼而右睽然須處心平更須臨事耐勿恃事理直

抗論多慷慨勿謂氣類同不虞趨嚮背先入勿徧聽未
信勿忠誨小遲歲月間足致治平最庶策三載勲亟應
千齡會

送王深道歸黃巖雲霞居并簡李微之周子靖
吳毅夫蔣良貴

之子雲霞居地隔千萬山三年三過我一見一開顏袖
出西游編字字破天慳可憐東門享不及海上閒後會
不可期天步方艱難贈別可無言烏倦宜知還白髮暮

倚閭山空水潺潺道逢兩倫魁風采照人寰出處各有
適為問二者間李周兩太史筆削凜二班為問靜中得
何方濟時艱老我疾病餘癩憂涕空潛回鴈可寄書勿
諉殆且煩

贈江西吳定夫

定夫江海士瘦骨如臞仙翩然及吾門不假左右先我
方厭塵埃一笑喜相延肩懸兩破囊既見始解纏我欲
具盃酒割雞烹小鮮自言乃長齋不受世葷羶少休入

西山幽尋徧崖顛山空四無人白眼問青天洞口得老
翁守死易一編高談慰寂寞其然豈其然去去不忍別
解衣示勤拳及歸已彌旬為我少留連道逢一病媪背
偻兩足攣津頭見羈旅數口依敗船料理窮晨昏奔走
環市塵足攣不良行結廬倚牆垣船敗不可航買舟捐
萬錢為慮極靡密要使終安全詰旦擬東還既夕重周
旋嗟子塵外客而結區中緣吾衰不能爾愧汗與涕漣
或疑破囊中探用若流泉子豈費長房一壺掛簷前或

疑瞿曇老濟世法無邊勤君為此來昏頑警沈綿君師
魯東家二說當捨旃理一而分殊先儒有遺言君歸更
商略書來慰殘年

送潘兄謁李弘齋

我欲遊廬山江長水茫茫我欲謁弘齋老去力不遑羨
子勇決策去若飛鴻翔及登夫子門必升夫子堂想見
七十翁神清氣揚揚客來語時事慷慨激中腸客去竟
無言高歌詠虞唐子行當寄書欲言浩難量問我今何

為為言老農桑論交四十年會短別苦長至今風雨夜
晤語思對床所幸天壤間日月同輝光何妨一寸心千
里遙相望小蟹有益友勁氣摩穹蒼及其即之温百卉
繁朝陽特苗天所托雙鳥鳴相將閩嶠幾時歸猿鶴久
悲涼憑將一語寄毋使三徑荒

吳門道歸書懷

投閒三十年日與木石俱暮景際休明搜羅逮樵漁洪
造賜甄收羣公交薦書殷勤奉明詔婉婉變辭田廬一寒

不自揣五窮暗抑揄行行步京畿迎勞多軒車眼青見
故人皆歎此老臞形容不自惜奈此氣昏愚席間迷舊
識筆底誤新書十目所共睹一語良非虛儻昧知止戒
不反田園居去去入脩門蹇步接天衢深虞眩聞見狂
易滋發舒顙天寫真情浩歌賦歸與

贈九華程兄

君家九華山山翠常在目雞犬聲相聞山腰幾隣曲本
固枝葉蕃無若君之族當年紫橐翁一念要親睦俸餘

不自有買田徧谿谷計口給之食昏旦常陸續吉凶更
資助常使有餘畜只今大江南盛事君家獨君歸廣此
意勝處新卜築周遭植名花中間敝家塾少長驅之學
毋間親疏屬庶幾子又孫更衍無窮福亦使紫橐翁百
世流清馥

漫塘集卷三

欽定四庫全書

漫塘集卷四

宋 劉宰 撰

長篇詩中

送王穎叔分教山陽

向來肉食昧遠謀坐談欲復千古讎良平不逐勝詭游
毛錐竟作書生羞楚山蒼蒼楚水流甲光向日金鱗稠
酒闌一笑看吳鉤將軍意氣傾九州先生身短智則脩
百鍊可使繞指柔安邊藉帷幄籌泮宮還獻馘與囚

英聲南來動冕旒
貂蟬未必生堯鑿

再韻謝和章之辱

老人把甕真拙謀
五利多方無一讎
嗟予老矣盍倦游
犢鼻豈恤王孫羞
舍西白鳥湛清流
舍東古木鳴蟬稠
晚風徐來月一鉤
從渠飛鷺墮炎州
君門有詔道阻脩
饑來聊復擷芳柔
諸君行矣攄良籌
鍾儀不慮南冠囚
野人何自自瞻前
旒所願邊封脫兜鍪

再用韻呈同席者

由來道同相為謀利交始合終相讎灌竇空如父子游
耳餘莫刷千古羞臞張不與俗同流常棣相輝華萼稠
侯生得句魚上鉤句法不減韋蘇州王子簡古師穆脩
時亦枯枝蔓新柔坐談不知改更籌絕勝雙鳥各處囚
可能無策上凝旒夕烽猶照萬堯盂

舟過橫塘有感

平波淺草橫塘路曾挽扁舟衝急雨朱顏綠鬢氣崔嵬
欲斥九關揮玉女萬古功名付汗青九天光寵生門戶

邯鄲一夢兩周星霜壓孤蓬日始晴風樹不停身已老
病容衰鬢鬼猶驚東烏西兔自昏曉北來南征幾時了
海上欲覓安期瓜山間却值孫登笑澤畔殷勤訊漁父
掉頭不言吾已悟蚤求富貴晚長年老少不同均計誤
連年旱魃失祈禳人肝不厭犬豕腸今年稻肥家有酒
萬事且付無何有

代賦三十韻呈李果州

時游茅山

退之抗表出潮陽高風萬世為美談
衡開雲氣偶然爾

浪占顯晦吾所慙皇華使者課第一詔歸臺省陪朝參
獻疏豈止一痛哭引去自言七不堪留行隱几卧不應
一麾出守天西南利名百念已灰冷掃除不盡山水貪
行遍金焦到茅阜知有佳處須窮探春花秋葉事已過
惟有山髮呈鬢髮山神頗亦愧岑寂夜奏萬谷笙鐘酣
起看瓊樹繞琳宇更馳玉馬無停驂子猷好事古無比
雪中求往固所諳青鞋直上最高頂天風縹緲吹梗楠
兩峯相對如拱立上公袞冕朝子男羣山斂退就平地

滅沒不見如紀譚巨浸東連大洋海浩蕩直與天涯涵

却顧淮源赤山下

赤山湖
舊淮源

僅若覆水盈甕久留不奈

景清絕山腰下轉臨深潭客來客去泉自湧可能喜笑

靜中含嵌崖往往記遺蹟舊雨剝蝕苔蘚寥客懷感此

重太息學仙便欲老石龕癡狂正復自譏笑曠望聊爾

依精藍元符舊事不可問翠微傑觀猶耿耿有田連阡

不輸稅飽食豈計皇恩覃渠儂不知游子恨寶鑰屢啓

彫龍函留連信宿苦未厭一笑相屬樂且湛龐眉道士

庸中倏成書自許窺老聃扣門有問不得吐退自包裹
如春蠶鬚李於書頗涉獵醫卜並試仍多婪提攜瓶酒
味苦短黃獨屢薦山肴甘坐談袞袞不知曉林杪忽送
鐘聲歸人生離別易感愴况我垂白今耗耗明朝日出
山下路宿雲散盡開晴嵐君歸千騎圍畫錦我留古木
繚茅庵期君再整冲天翼老我甘作書中蟬

畏雨不出簡張端表昆仲符伯壽諸兄

我居市北子市南中間萬口喧春蠶子來自南我自北

繚繞東西厭匍匐坐不言中有得谷鳥一聲驚晝息
翻然却念友多聞獨有君家好弟昆嘯軒團團朝至昏
古往今來入討論興來握手眇乾坤一鼓平沙萬馬奔
隔牆更喚符夫子青眼相看忘汝爾金丸屢墮銅壺冰
欲竟書囊了無底不辭勇往問荀陳脩竹亭前一欠伸
朝來好語閒行人老龍駕雨上天津

速陳李二居士還茅山

陳居士不甘世味而以醫受知於石大夫李居士不

受世事而以暴見過於杜通直通直時就養尉解乙
亥夏皆來金壇漫塘叟恐孤林壑之望為賦此詩以

速其行

髯李魁然玉抱璞淡陳蕭散出林鶴華陽洞口笑相逢
天風自奏鈞天樂飛雲出岫本無心大隱不必皆山林
朱絃自振山水音玉喬梅福古猶今君不見洛之南涯
溫生北涯石明月灘頭弄澄碧河陽御史一張羅曉猿
自掩松關寂久旱得雨方一犁山南種豆猶其時山僮

倚擔遲君歸語君雨過黃獨肥亦有晚笋穿疎籬急歸
燒笋煮黃獨北山移文可無續

喜西崗橋成并書邦美東西橋記後

西崗水與洮湖通脩梁自昔橫西東百年興廢人不同
誰其記者竹庵翁喜君架木續前功朝曦夕照明垂虹
地脉不斷和氣鍾紆朱曳紫還家風避迓歸來一畝宮
幽花野草迷青紅躬耕會有年穀豐笑詠五柳早揚雄
可但日高花影重羅帷醉起酣笙鐘

和劉聖與顧龍山約客韻

詩筒四出走中涓詩句萬選如青錢曰余借舟期七賢
共嗅梅花咀芳鮮津頭幾度喚長年晝眠乃若經筵邊
舉頭急雪風中旋瞪視不見山之巔八牕玲瓏繡佛前
同來且結西方緣小軒宛若壺中天玉琴不斷雨聲傳
諾君再宿余敢愆從君索句發春妍

寄和趙章泉

章泉先生虎豹章餘子駭逐狐兔藏少陵遊不返衡湘

孤吟風月老林塘
駕鷺不送我置傍
悵望空勞水一方
廣文別日天未霜
殷勤寄音示無忘
新詩寫作鴻鴈行
憐我病骨猶嵇康
續貂聊復寄歸航
宮牆百雉如金湯
登門歲月知何當
江湖極目煙波滄

寄呈王浩翁府判

天下江山推第一
多景名樓信端的
君家正占多景前
第一風光環燕席
梁邑歸來縣債了
驂騑得路乾坤小
錦衣聊復效晝游
戶庭鬱蔥佳氣繞
手栽松菊成三徑

更啟軒楹臨綠沼客來寧厭馬喧櫪夜宴不知雞戒曉
辟書聞又上公車連帥親題仲舉輿只今淮上未安集
烽火夜照雲模糊要知兩淮須保障保障一撤長江孤
邊臣之慮不及此但知椎剝供芑苴紅女去機農釋耒
荆榛滿野號鼉鼉君官其間踰十載洞識本末知盈虛
願君亟分刺史符稍回和氣還邊隅盡收民戶入赤籍
有功必賞罪必誅招來耕桑徧隴畝撫摩一意淪肌膚
人知親上死其長荷戈不憚供前驅關如當道卧於菟

麋鹿遞走寧復餘更歸未用師黃石且侍玉皇香案側
不惟文武見全才要與清朝分淑慝

送魏華甫侍郎謫靖州

靖州風物最五溪畬田歲入人不饑淘沙得金邀以嬉
瘴煙不逐嶺雲西六花瑞臘春臺熙尤便逐客過往稀
理亂黜陟了不知夫子豈欲居九夷要尊主勢扶時危
有言不用時我違翻然不受好爵縻向來鄉行誰可睇
平生易名慕者誰蘇陳凜凜百世師畏塗萬折甘如飴

求仁得仁固其宜大明當天照隱微直前一疏可忘之
江湖後會端有期暗香微動寒梅枝臨別不用長嗟咨

送王常博萬歸蜀

東溟之水浩無窮蜀江滾滾來朝宗聖神天子坐法宮
日月所照梯航通君才當代相如雄雲煙落紙聲摩空
西來闡教臨辟雍冠帶濟濟如雲從力排黨論開至公
鳳鳴駭矚朝陽桐太常正俟肅臣工歸舟却泝蜀江風
蜀天萬里車書同不應一士無留中篙師捩柁毋匆匆

趣回有詔紫泥封

奉送符伯壽尉太平

一年三伏秋後前大火更借炎官權竹林杖屨北窻眠
君方陸走水行舡君言半世苦迍遭一官遲次安且便
瓜時驟及非偶然今我不往人爭先交承久宦思田園
側身東望心悵悵民情厭舊期改絃今我不往人煩寃
左符再下催行軒欲挽君留胡得焉君才明敏性靜專
天府四舉賢書連民淳不假綵棒懸定知學子來差肩

酌君薦藕侑新蓮青白不受汙塗遷贈君以筆并吳牋
官閒鐵硯勤磨研敬亭山下有臞仙耕雲釣雪老林泉
癢疴預欲知民編少屈從之古道邊長官報政將朝天
集英唱第吾同年賸欲因君寄短篇有言不盡中勤拳
相逢一笑開初筵為說故人今白顛

題解生山水圖

長江之水西南來江北江南圖畫開君從何處得此景
錦帆似泛長江回槎牙老樹連荒島兩兩人家出林杪

鷗飛欲下洲渚寬雲橫不斷關山杳圖窮雙嶼金焦峙
仙宮縹緲浮寒水拖樓挨轉吳波平閭闔中天日月明

玉糝羊歌

華陽洞口玉糝羊世人傳得神人方雪團入口桂椒香
能令老者壽而康瑤池玉佩正丁當箬包聊薦九霞觴
世言神仙不鮮食初平山中果何物桃源更有避秦人
割雞為黍迎來賓

石翁姥

采石江頭風晝息
掀天雪浪平如席
沿崖小泊客心寬
攀蘿曾看望夫石
天涯望斷人不歸
露寒猶想淚霑衣
爭似石翁攜石姥
年年對峙夾岡道
人歸人去我何心
雨沐風餐人自老
比翼烏連理枝年
多物化徒爾為長
生殿裏知不知

送趙居父入淮東漕幕

儀真在昔發運司
承平舊事猶可稽
歲漕東南六百萬
石米自淮入汴趨
京師周原六轡光
陸離建臺想像因

遺基水浮陸走舟車馳轉輸十九邊餉糜古今事異吁
可悲民力已困國不支長才入幕宜深思皇華使者須
良規

雅去鵲來篇

昨日雅鳴繞庭樹道上行人色驚懼試呼行者問如何
身為戶長催殘稅稅殘自昔稱難理三年尤非四年比
加之逐保有逃戶每一申明官長怒人逃信矣田不逃
其奈逃田不知處厥初經界失區畫比近立租相什伯

大家置產錢欲輕小家鬻產價欲增上田只割下田賦
賦存田盡因逃去或因土瘠遂流移歲久田侵人不知
更有鄉胥迫科抑多推少割隨脅臆民愚而神難盡欺
往往增入逃戶籍以茲逃戶日增多戶長蚩蚩奈若何
向來差役多輕重戶長之中中產衆比來里正多義役
各欲供須有全力搜羅中產無孑遺戶長人人家四壁
官司禱雨徧明神施行寬政蠲房緡房緡僅可寬游手
那得實惠霑農民千錢代輸猶可出今日方輸又明日

父兮母兮叫不聞遺體鞭笞同木石日日雅鳴期會到
血洒公庭深不掃遂令着處聽雅鳴鳧飛魄散心如擣
和氣致祥乖致異已甘旱魃來為祟忽驚雅散鵲交飛
高枝報喜仍低枝萬口懽呼聲動地府今盡放三年稅
曳鈴走卒天上來立張大榜當衢市黠胥駭愕頓兩足
戶長仰天攢十指瘡痍未愈失呻吟感激過深仍涕淚
又說新租亦寬限四年舊欠寧不爾亦知經賦難逭責
少紓庶可容催索使君從善真如流仁人之言為慮周

畫諾一時良易幾人共拜更生賜人意會同天意感
急足未回時雨至始知此術勝祈禳開闔陰陽俄頃耳
何妨甘澤尚愆期我作此詩禱告之象龍可仆蜥蜴縱
蛟龍自起霹靂隨謂予不信難強語請驗吾邦今日雨
詩成欲謝更有祈新租輸送此其時分科本色歸上戶
細民勿使折納遲四年逃閣尚充數積弊那能倉卒去
且應除豁見真的孰恃強梁敢逋負若然民病八九瘳
閒暇何妨版籍修推排得人弊可見逃租十失五可收

更令義役廣前制戶長里胥同一體庶幾二役適均平
不使貧民偏受敝豈惟澍雨快一朝縱有凶年皆樂歲
報喜不惟乾鵲噪大人屋上烏亦好

長篇詩下

秋日題儀真寓廨時秩滿俟代

非崖非巔壁立蒼然野花炯炯媚朝日
樛木繚繞棲寒煙歸乎歸乎幽深此便居
乎居乎市聲晝喧紛去住於吾心定
取舍於吾言竹色一軒秋雨後荷花十
里晚風

前錦城不似還家樂獨立津頭欲問舡

野犬行 嘉定己巳作

野有犬林有烏犬餓得食聲呶鳴烏驅不去尾畢逋田
舍無煙人跡疎我欲言之涕淚俱村南村北衢路隅妻
喚不省哭者夫父氣欲絕孤兒扶夜半夫死兒亦殂屍
橫路隅一縷無烏啄眼犬銜鬚身上那有全肌膚叫呼
伍伯煩里閭淺土元不蓋頭顱過者且勿嘆聞者且莫
吁生必有死數莫踰饑凍而死非幸歟君不見荒祠之

中荆棘裏彎割不知誰氏子蒼天蒼天叫不聞應羨道
旁饑凍死

猛虎行

市有虎毋妄言當關虎士森戈鋌市上一呼人駕肩虎
雖猛那得前市有虎言非妄君不見左馮諸邑天下壯
斧斤聲斷林壑空猛虎通衢恣來往食人肉飲人血
沈痛積寃何可說凝香堂上紫煙浮風流太守憂民
憂一朝下令開信賞藉皮枕骨彌山丘虎已滅人患

絕夜永猶聞泣幽咽泰山之側如可居子後夫前甘死
別

病鶴吟上黃尚書

度
并序

伏聞課長淮綏靖之績陞西清次對之班爰按彙
章當舉自代以某備數切惟此舉前輩所重如韓
文公之於錢徽歐陽文忠公之於呂公著皆其名
位已高才望素孚故聞者不疑受者不愧如某么
麼加以不可療之疾分甘屏處忽冒公舉豈惟

駭聽上玷師門抑與漫浪之迹不相似然昔唐張
司業受東平之辟而愧其不就賦節婦吟以謝好
事者至今傳之某才固不敢望司業而受舉不能
報與之畧同用敢擬節婦吟之作賦病鶴吟寄上
五湖浩蕩平沙暖病鶴摧頽翅翎短萬里空懷宿昔心
忘機已結沙鷗伴華表飛來遼海仙人間嘉會恰千年
一聲嘹唳九關傳虎豹辟易不敢前盡推同類遊鈞天
浮丘王喬相後先縹緲遺音墮雲際應念沙頭苦憔悴

欲令弱羽更軒昂共駕飛廉騎六炁瑤池飲芝田戲五
湖回首皆塵世菰米熟藕花鮮五湖秋色正相便寄聲
青鳥謝勤拳摧頽病鶴那能然

吳子隆兼隱齋歌

前驅十里旌旗紅後騎蹠躐如游龍綺窻阿閣最深處
歸來燕坐圍香風不如理掾吳夫子岸幘高吟酒一中
嵩少山頭渭水邊耕雲釣月老林泉巢由不生沮溺死
魚鰕麋鹿俱忘年不如理掾吳夫子安閒寄傲庭西偏

富貴誠可樂幽棲端足尚牽黃復出上蔡門李斯悔殺
為秦相介推有母須求祿不應決意歸綿上吳夫子聽
我歌當朝劔佩冠峩峩趨營未免傷天和古來隱者亦
已多潔身亂倫如彼何君今非仕亦非隱京塵不染白
玉珂青衫從事今十載萬事忘懷真實在但令堂上笑
平反豈計庭前羅翠黛是中不減山中樂底用青鞋游
物外吳夫子吾所敬兼隱名齋足相稱誰其尸之勾漏
令

傲將軍歌贈周叔子馬帥

君不見細柳將軍專號令
壁門不受天子命
又不見隆中將畧天下
竒屈致不可就見之
丈夫意氣類如此
達則守官窮守已
齋壇未築國士去
軍令已申美人死
王翦定須六十萬
李牧必遵前日軌
掃門求見齊舍人
魏勃妄庸何足使
武皇踞厠對衛青
淮南君臣暗歡喜
寥古道不復見
後來捷徑何紛紛
炙手儻可熱
舐痔未為勤
金珠要結徧奴隸
鈇鉞倒置由他人
傲將軍今無

矣杜預苞苴通貴近裴度浮沈聊卒歲兩賢屹立尚如
斯噲等區區焉足計傲將軍今有之我得見之喜可知
行年六十未為老三衙致位官非早毛錐子毋我欺妙
年手折桂林枝長鎗大劔爾胡為十載安邊功書遍太
常旗周宣方歌境土復吉甫已賦明哲詩詔書星斗爛
駟騎風雷馳平生許國心日莫恐倒施皂囊九扣闍山
立志不移時攜一樽酒山水自娛嬉傲將軍誰與同子
真已去吳門市杜陵不見天隨翁賴有倜儻朱杖屨時

相從虎丘山頭弄明月姑蘇臺上吟清風為樂良有極
大義終無窮謹勿扁舟載西子有時獵渭占非熊

代同游者賦宿雲軒呈李果州

君不見流金鑠石氣如焚巫祝並禱天不聞霧霈一雨
洗乾坤膚寸而合山中雲又不見疾雷破山風助勢八
表同昏天地閉峯頭一抹斂歸雲赫日當空鬼神避祇
今歲杪雪霜餘得向巖前自卷舒等閒且伴幽人宿明
日春回須雨足

送趙玉甫赴穿山鹽場

時又有池陽辟命

辟書朝東來海上便擬尋蓬萊坐令斥鹵皆春臺辟書
暮西至頒春又擬陪千騎江水江花盡和氣浮屠將就
要合尖洊雷喚起蟄中潛東西惟命夫何嫌諸公爭令
出門下意豈專為一日雅君姿秀整氣清道露華凝曉
月澄秋甯中武庫森戈矛筆下倒瀉三峽流甘泉持橐
侍凝旒青氍舊物唾手收惻然正應側席求東行西行
寧久留祖帳馳華軒嗟余守環堵贈言古有證臨分敢

無語紛紛曳紫腰黃金儼然望之真天人萬世在其後
念之徒酸辛富貴誠可樂名義吁可畏此意儻無忘鴈
來頻寄字

觀瀑布圖

仰觀山糝糊俯視山歷歷見卑不見高此恨通今昔觀
者笑且言畫手非用力安知畫工心獨苦世上悠悠幾
人識君看白練飛杳不見來跡疑從九霄中直下恣噴
激六月天無風大暑鏤金石此景獨清涼飛雪灑石壁

此豈銀河翻餘派墮空碧抑豈龍門決洪波注八極方
知畫者心不止存目擊山上更有山去天不盈尺丹崖
與翠巘羣仙所游息煙雲不可到日星在几席甘露被
草木醴泉出巖隙流落人間者萬派祇餘瀝知畫豈予
能因畫重悽惻聖賢言外意未可紙上得所以說詩者
要在以意逆安得畫外觀山人共向書中探端的

贈芮醫

乳母夜深紉故衣針墮兒側媯不知兒膚受針口啼哭

展轉無眠針入肉明日啼聲甚夜來問兒疾苦誰能猜
拊摩忽到傷針處兒啼欲絕姥方悟醫師睨視了無策
鄰母驚嗟悉來覩羣兒竊聽聞肩竦毛髮豎為生昂然
來自言醫此屢探懷出良藥布指揣針路斯須穎脫出
肌理自如故嗟哉此神術小試輒如許我聞在昔陳留
市刀鑷工中人避世至今山谷後山詩明月夜光光照
地又聞宋人有藥手不龜世世游統無贏貲客得其方
說吳主大敗越師因胙土方今北境猶多虞萬金良藥

時所須汝胡不往此踟躕芮生莞爾笑倖利吾所誚喟
彼陳留翁異世或同調

天馬歌書劉漕

彌正

子淮海秋思詩藁後

貳師城空渥洼涸百年徒費秦川權眼明見此玉花驄
畫工如山筆難貌朔風號朔雪舞交河水冰連后土一
聲嘶入玉門關掣斷陰雲日當午超八駿友六龍天人
一笑和鸞雍駕駘百萬那能從

賽龍謠寄陳倅校書

模

兼呈黃堂

重光協洽之歲夏四月朱方不雨川源竭田家汲井灌
新秧綆短瓶羸汗流血太守憂民一念深欲決銀河起
伏陰彌月驅馳徧羣祀雲捲碧霄呈象緯聞說南洲有
螭龍百年水旱資神功民言直徹九天上絲綸屢下恩
光重來往瞻言三百里別乘親行古無此潔蠲牢醴薦
芬馨願借英靈一瓢水瓢水英靈亦何在精誠自與神
明會炎官叱馭正當空豐隆已駕隨飛蓋歸軒暮扣古
城闐霈澤朝均千里外秧田得雨變青青麥田流水迷

溝塍擊壤歡呼紛老稚慚愧今年又豐歲典衣沽酒賽
神龍一飽權輿神所賜神龍貯蠻意已傳似言此賜非
予專一瓢汲水能回天多謝紫府瀛洲仙瀛洲仙人笑
揮手龍不言功我何有祇今千騎擁朱輪即是商家大
早作霖人

再韻謝和章

萬竈連營橫塞月委輸不繼官倉竭邊兵雖暫罷橫戈
塞馬猶聞馳汗血赭衣開河深復深青青蔓草生河陰

歲旱民饑神之祀故老言言徵讖緯使君事業今變龍
十年準擬調元功銅虎分符又南國北來更閱千山重
同寮有客居同里憂國同心無彼此既知東海之婦可
致旱又知疏勒井泉能涌水釋囚祇有園扉在蠲租可
但寬期會日照齋盂食不暈雨濕朝衣車却蓋已罄祈
禳徧國中更遣緹車來郭外荒祠蟲篆上丹青平原龜
兆坼田塍拜手殷勤祝田穉活國生民係茲歲再宿為
期神效靈三日為霖民拜賜長淮轉漕速郵傳此賜豈

獨吾邦專雨餘亟欲披青天那得駕鶴揚州仙精意回
天翻覆手赫赫陽光均九有但得兩君便攜手齊上紫
清扶日輪闔闢陰陽端有道不妨風月屬閒人

再用韻

公詩滄海生明月草木光輝涯不竭僕如拙匠運斧斤
顏汗淋漓指流血心知短綆難汲深拱把之木無繁陰
風雅墮地幾千祀牢落荒林鳴絡緯眼明紙上走虬龍
古錦囊中新奏功搜竒往往魑魅泣窮高不礙天門重

鵬飛羊角三萬里筆勢翩翩有如此渠儂辟易虎負嵎
公獨從容禹行水端由萬卷胸中在左右尋源無不會
詩壇獨上四無人烏兔驅車天倚蓋曹劉沈謝不支吾
陰何間隔孫山外池塘不夢春草青愚生已分老田塍
縣榻空煩禮徐穉一笑相逢俄隔歲不辭入府異龐公
祇恐言詩非木賜朝來好語日邊傳大惠寧許一州專
詔書絡繹催朝天紫薇帝庭領列仙釣船已入酒聖手
清風一枕無何有遮留當道擁車輪尚能喚起隨邦人

和陳倅田婦刈麥韻因解嘲

君不見山東健婦把犁耕子美為賦兵車行我嘗一讀
三歎息尚想青天聞哭聲又不見峽女生涯在兩腳鬢
髮飄蕭不堪掠我嘗三復負薪篇亦是子美夔州作山
東征戰苦未平峽女家貧無斗升吾邦之俗異於是賦
調不苛閭里寧八月詩人歌載績餘暇不同力穡况
復樵枯良易易自昔民生在勤力通守於民情最親勞
農不憚行侵晨他日席前須記取要使深宮識苦辛

運河行

運河岸丁夫荷鍤聲繚亂紅蓮幕府誰獻言運河泄水
由函管函管掘開須到底運材歸府供薪爨庶幾一壞
不可復民田雖槁河長滿民田為私河則公獻言幕府
寧非忠我聞此言為民說急趨上令毋中輟小民再拜
為我言函管由來幾百年大者用錢且十萬小者半此
工非堅厥初銖積費民力厥後世世期相傳豈但旱時
須灌溉亦憂久潦水傷田向來久旱河流絕放水練湖

憂水洩州家有令塞函管函管雖存誰復決小須雨澤
又流通函管猶存不費工只今掘盡誰敢計但恐民田
從此廢豐年餘水注江湖涓滴不為農畝利有時驟雨
浸民田水不通流禾盡葉况今農務正紛紜高田須灌
草須耘盡驅丁壯折函管更運木石歸城闔呂城一百
二十里不知被擾凡幾人太守仁民古無比凝香閣下
寧聞此願傳新令到民間函管須塞不須毀已填函管
無尾閘大舶通行水有餘函管不毀民歡娛異時瀦瀉

無妨渠憶昔採詩周太史不問小夫并賤隸試哀俚語
扣黃堂鈇鉞有誅寧敢避

憶昨行寄呈劉法曹

憶昨太守宣城陳人物風流法從臣太息官倉取無藝
要與邑民圖久計總將一石計其贏三斗八升為定制
厥初號令如雷霆奉行誰敢主撮增愚民不解深長慮
競喜當時斗斛平新守迎來舊守去號令雖嚴誰復顧
斛面坡陀斗面高三斗八升作常賦後來主簿辛君機

太學聲名盛一時。竭來意與上官合。委向倉中司出納。
籌筭親臨絕蔽欺。戶庭凜凜無喧雜。愚民乍喜見明官。
既量寧論加勺合。上供送使有成數。羨餘到底歸州府。
明年按籍取之民。三斗八升更增五。徃者不可諫來者。
圖之猶未晚。只今太守龔龔黃。比千里瘡痍如切已。公事。
勤勞絕燕私。私錢大半供公使。選官受秋輸而得法曹。
賢除弊幾十九。積羨踰三千。三千寧足州家用。祇恐從。
今還作備。明年四斗三升之上。更增科三十六都之人。

將奈何

殺虎行謝宜興趙大夫惠虎皮虎腊虎睛

君不見陽羨周將軍射殺南山白額虎千古萬古聲流
聞又不見宜興趙大夫南山三十有六虎令行殺取無
復餘一虎昔何少三十六虎今何多虎多人不患所患
政之苛苛政滅人門猛虎戕人命擇禍莫若輕泰山之
人論已定大夫性高明下令走風雨所知在田里了不
見臺府既令民免政之虎又與民除虎之苦四境之民

歌且舞或云殺虎太傷和胡不令渠自渡河我聞此言
笑且呵大夫憂民憂豈必限吾土不然鄰國以為壑信
也白圭愈於禹古陽羨今宜興大夫邑之主將軍邑之
民主賓多寡事不同千古萬古同清芬

過司徒墓

司徒墓荒塚累累不知數草中翁仲無復存壟上牛羊
自來去想見當時百萬松佳城在處鬱葱葱車馬時來
卿相子鐘魚聲出梵王宮年深事遠無留蹟只與耕夫

資壑闢萬古同成一窖塵官爵高卑誰汝識

用前五字韻趣劉聖與建第

君不見茅屋下四壁床敷窄又不見朱門中金碧鎖空
宅宅成更欲致良材水浮陸走空山澤茅屋區區誠已
疎朱門汲汲彼何迫勸君勿學伏波老自詭裹屍須馬
革又勿學金谷人綺窗阿閣綿阡陌但令庭宇潔頗與
塵囂隔市聲不至亂琴書厨煙可免衝咽啞庶幾家人
安亦使我心獲吾宗開敏姿富有濟時策棟宇著易象

義不假探索况聞玉堂直視草須元白所期不日成毋
使中道畫庶奉紫芝泥即刷青雲翮

寄刑臺范黃中

秋氣清秋風高想見刑臺舊居士巾車獨往恣遊遨偃
仰戴公廬逍遙焦公居想前輩之風流悲末俗之崎嶇
白眼睨視抵掌嘻吁酌之以漫塘之酒侑之以漫塘之
藕酒之味醇而不漓藕之性潔而不汙以泥于以介眉
壽于以明素守對此長歌其樂如何相望雖隔於秋水


明月幸同於千里

跋趙憲

汝樵

唐率更千字文蹟

草非草真非真柳之骨顏之筋歐張瘦硬可通神衆體
備兼衆美莫臻興嗣書無首亦無尾當年好事人各欲
徇所嗜割截同至寶得中固為喜莫將俗眼看墨脫字
已漫當年寶匣中什襲幾歲寒祇今煙雲披星斗尚闌
干麟角鳳背毋輕棄煎膠續弦端有冀君不見四牕寶
此不寶他固應落筆驚風雨走龍蛇



漫塘集卷四

欽定四庫全書

集部

漫塘集卷五
六

詳校官庶吉士臣翁樹培

主事臣呂雲棟覆勘

總校官原任中允臣王燕緒

校對官助教臣蔡鎮

謄錄監生臣戴天民

欽定四庫全書

漫塘集卷五

宋 劉宰 撰

辭免狀

辭免除藉田令第一狀

伏準省劄四月二十三日三省同奉聖旨劉某除藉田
令某螻蟻微生忽叨恩命戰悸不知所云抑區區情素
有不容不吐露者某蚤由科舉僥冒出官為尉為掾為
令汲汲寸進初非忘情宦達一自辟屬倉臺偶得風疾

浸淫滿面乃丐嶽祠以歸曾未兩月復拜堂審之命某是時猶意此疾可療欲俟小愈奔走赴闕不謂所感日深百藥不效以迄於今形容變改語音僅存竊自循省豈堪綴班行之末重念某幼時家匱不免饑寒病廢以來一意耕桑服勞過甚年甫六十手戰而難於執筆髮脫而不可勝冠晝以目昏廢書夜以心忡忘寢雖欲少效尺寸以自見於明時有不可得瞻望闕廷但深悃結所有省劄不敢僭效達官寄留州縣謹端拜襲藏傳之

將來為子孫榮伏惟鈞慈特賜敷奏改命時髦以光初政容令孱瑣自放漁樵須至申聞者

第二狀

某伏準省劄以某辭免新除藉田令奉聖旨不允疾速起發前來供職某洊膺寵命俯極戰兢伏念某蚤歲效官位不過掾幕中年屏居身不入朝市容臺列屬中旨趣行皆耳目之所不接夢想之所不到况聖上天德出震之初正萬化維新之日而公朝進擢猥及么微在某

可謂非常之遇雖無知如草木亦覺欣榮雖無情如鳶
魚亦當飛躍某其敢固執其愚仰孤鴻造實以衰疾之
軀不但形容如鬼踈率之性時或語言如狂且久安漁
樵遂廢筆硯猶之猿鳥必不可與麟鳳同瑞聖時猶之
瓦礫必不可與珠玉竝登王府惟當退伏田里含哺鼓
腹詠歌太平所有藉田令職事或聖君賢相必欲矯俗
之敝擇不求者與之則世之志不苟求而學行才美百
倍於某者何可勝計姑以所知言之前鉛山縣丞羅愚

鹽官縣丞周師成新湖州錄事參軍杜範新真州教授
潘彙征愚乃故樞密點之季子餘皆進士第是四人者
稟性不同至事親以孝律己以廉蒞官以勤臨民必怒
行之以公不顧望以避怨得之有道不僥倖以干進則
四人者同歸一揆又前真州支鹽倉洪秉哲初擢第主
歸安簿甫數月母病馳歸因留不去母病有間勉之仕
不得已授真州鹽倉郡守豐有俊檄入幕賴其助有俊
為本路提舉復攜以行及為淮西帥以隔路不可檄致

乃轉以屬江淮制置李珣珣屢檄其出而本路新提舉
汪綱又欲其留秉哲難於從違遂兩不就因以避事為
珣所劾至今未得差遣其兄亦四請鄉舉免舉不到省
遇赦不該恩兄弟怡怡不知老之將至前修職郎戴埜
為麗水尉寄居有挾勢奪村民之舟者埜執不與守怒
撻吏奪舟與之埜即拂袖去初埜弱冠其父為求同姓
牒因發國子解登第埜以家狀中微有遷就言之輒愧
汗其後父喪服闋遂自陳棄官今已十餘年家居深山

惟讀未見之書為有用之學閣學楊簡知溫州日已嘗
論薦乞命以官是二人者其特立獨行無求於人尤為
人所難或公朝不以某為狂僭於六人之中特拔其一
而改畀之皆足以使頑夫廉懦夫有立惟是某自為已
計既重於方命之誅妄為人言更合貽犯分之罪尚祈
寬大之朝曲賜矜貸某不勝俯伏戰悸之至須至申聞
者

第三狀

某伏準七月二十七日省劄以某再具申乞寢免新除
藉田令職事三省同奉聖旨依已降指揮不允疾速前
來供職某瑣瑣一介仰勤君命至再至三魄褫魂驚罔
知所措其敢固執愚陋數犯天威實以某賦分素薄得
疾多端最是風毒上攻形容變改已嘗具申不復喋喋
兼某少不涉學懶與性成長不通方動與物忤故偷安
窮巷以苟餘生蓋欲仕不能非能仕不欲與老成前輩
德尊行高養素丘園者不類若貪冒寵榮強顏就列則

是積年抱疾乃為今日進身之階必速煩言上累初政
某雖萬死不足塞責伏望察其由衷曲賜敷奏檢會某
已申事理施行伏候指揮

辭免特改奉議郎添差建康倅第一狀

某伏準鎮江府遞到八月十四日省劄以某三具辭免
新除藉田令三省同奉聖旨特改奉議郎特添差通判
建康府仍釐務填闕某么微之踪方命至三正爾戰懼
莫知所容而異數沓來驚魂益以四逸竊惟改秩之必

用舉主丞郡之必更作縣此祖宗成法所以垂萬世之規否則必嘗登對而知其能擢用而試之事某近者雖荷甄收俾綴奉常末屬即具辭免初非已經登對及曾受任使之人况藉田有令雖官王朝在昔列於九品於今通差選人某昨被恩除已以疾控辭乃今躡陞朝籍遂佐留都則受之是前日之辭為飾詐今日之受為擇利有一於此罪在不赦某則安敢又某昔在先朝年方強仕嘗被旨赴都堂審察亦以疾辭迄於今十有八年

以年則昔壯而今老以病則昔淺而今深辭受一殊萬
死莫贖伏望不棄小物曲諒愚忱仍賜敷奏一併收回
誤恩毋使蟻蝨微臣稽違君命以速明刑不勝席藁俟
命之至所有省劄某不敢祇受除已寄收金壇縣庫聽
候指揮須至申聞者

第二狀

某準鎮江府發到九月十六日省劄以某辭免特改奉
議郎添差通判建康府恩命三省同奉聖旨不允某疾

病餘生薦叨誤恩半年之間四上控辭之牘自知狂僭
罪在不赦今又拜不允之命仰體天涵地育之仁感深
泣下但某為風毒所侵漸類惡疾委不可仕若牢辭不
已不惟上紊清朝亦恐得罪公議謹當尋訪良醫多方
治療儻數月之後稍覺痊可即祇拜恩命以效奔走或
疾證已深藥力不及亦當續具情實申取指揮庶進不
孤造化曲成之恩退亦不失臣子拳拳奉上之義須至
申聞者

第三狀

準十月十三日省劄以某申乞居家尋訪醫藥奉聖旨
依已降指揮不允給假兩月將理候假滿日起發之任
某即已遵稟外今假限已滿所合具申某聞事君當致
其身尤當用其情故公爾忘私國爾忘家者士大夫致
身之義病則免老則致其事不强其所不能不戀慕其
所不當得者士大夫所以用其情國家所以原其情也
某愚不肖蚤歲塵忝科第服勤州縣凡十有七年見義

必為當仁不避惟恐一日之失其職雖位之卑名之微其於致身之義畧亦無愧不幸有疾屏跡田里垂二十年聖明御極振起滯淹某偶以踪跡近似首預招延之數嘗以情實申控復拜改秩丞郡之命凡海內陸沉七選之人誰不欣艷以為非常之遇某或牢辭不已人必以為沽激故某一再控辭之後不敢喋喋只乞居家博訪醫藥候痊可日拜命尋準前件省劄某仰體造化曲成之意多方從事醫藥緣所感風證歷年已深百藥不

效藉有良方非年歲間可以責效竊恐稽留成命罪在不測謹再具情實干紊伏望哀矜特賜敷奏容令某守本官致仕或以其年尚未及不忍棄捐即乞改注獄廟差遣一次異時或有痊可之日誓當糜捐以圖報效須至申聞者

辭免除直秘閣宮觀第一狀

某伏準省劄以某陳乞守本官致仕或祠廟差遣正月二十三日三省同奉聖旨不允依舊奉議郎除直秘閣

主管建昌軍仙都觀任便居住者累月顙哀實迫於疾
一朝從欲俾便厥居聞命震驚拊躬感泣仰恃乾坤之
大載陳螻蟻之私夫老於選調而有脫選之榮久矣逸
居而冒均逸之寵皆為異數所合牢辭顧惟中廢之病
駒許仍伏櫪更類深林之倦翼得且安巢其敢不已於
言以瀆蓋高之聽惟臣子之直中秘乃國家以表外庸
要須治郡而著循良之稱按部而有澄清之效倘不由
此弗輕畀之深惟洪造之曲成蓋援同升之近比其實

才品有異又且輩行不同彼真養素於丘園此特卧疴
於田里至學問源流於諸老詞章模楷於後來皆其所
優非某能及倘恩榮畧等將負乘致譏伏望朝廷特賜
敷奏收回直秘閣恩命姑令某以奉議郎主管建昌軍
仙都觀任便居住庶幾愚分得以少安師言亦可允穆
實受天地終始生全之賜須至申聞者

第二狀

某伏準省劄三月二十三日以某辭免特授直秘閣奉

聖旨不允伏念某叢爾小臣懇辭恩命展轉經年若必待控辭貼職得請而後拜命實恐稽緩以干慢令之誅謹已望闕遙謝祇受奉議郎主管建昌軍仙都觀恩命訖外有中秘之職實非乍脫選階素無朝績之人所敢冒居謹昧死固辭期必得請伏望公朝檢會某前申事理特賜敷奏施行伏候指揮

第三狀 代作不錄

辭免除直寶謨閣宮觀仍令吏部理未陳乞磨

勩年月日與依條轉官給告第一狀

某伏準省劄三月十七日三省同奉聖旨劉某除直寶
謨閣依舊宮觀令吏部理未陳乞磨勘年月日與依條
轉官給告者某恭覩省劄不勝戰懼某竊惟名以勸功
官以序功祿以食功乃聖世馭臣子之成法故一命以
上苟效職公家位分雖殊皆可得祿而官則不然非有
考任不遷臣子苟有考任則才品雖殊皆可遷官而職
名則不然有無不可以例言遷轉不可以日計蓋國家

設此以鼓舞士大夫趨事赴功之心故聖世重之如某者蚤得惡疾形容變改不可以蒞官臨民故三十年來屏伏田里未嘗尸一日奔走之勞向叨祠命已愧罔功竝不敢支請俸給今又畀之則非所以食功久侶漁樵姓名不入考功之籍而令計在家年月進秩則非所以序功而况職名向也無功而得今也無功而遷其於勸功也何有某自揣微賤不敢犯分控辭以速罪戾惟是光廟謨訓內閣寶藏寓直其間至為遴選固有累任監

司郡守而未得者其實何人其敢冒受伏望公朝察其
愧懼之真情非有一毫欺偽特與敷奏賜之寢免實受
隆天厚地保全晚節之恩某無任祈叩之至

第二狀

某伏覩鎮江府遞到省劄以某辭免新除直寶謨閣等
恩命四月二十一日三省同奉聖旨不允某以螻蟻之
微辱乾坤之造控辭不獲其敢薦有申陳自速罪戾而
某區區愚心有不容自默者竊惟先朝以來臣子有不

由實歷而躡陞秩序者非其學問過人必其節行超俗
某蚤歲涉獵時文竊取科第一行作吏即又棄置汨沒
吏塵初無學問可言中年得疾醫藥不效從所屬保明
去官疾勢綿延以迄於今蓋欲仕不能非能仕不欲初
無節行可述向沐誤恩改官畀職辭不獲命黽勉祇拜
已深愧懼今安敢復冒殊私伏望憐其賦予之薄察其
祈叩之誠特與敷奏收還直寶謨閣等恩命使其且得
偷生閭里與田夫漁父詠歌太平實受隆天厚地之恩

伏乞照會申聞事理伏候指揮

辭免除太常丞第一狀

先準三月十七日省劄以某再具辭免除直寶謨閣仍
舊宮觀令吏部理磨勘轉官恩命奉聖旨不允尋準吏
部給到朝奉郎直寶謨閣主管建昌軍仙都觀告一道
未被受間太常寺轉人送到六月二十四日省劄劉某
除太常丞某竊惟事君臣子之大義欺君臣子之大罪
某幼知讀書即識此理不幸當強仕之年得癡風之疾

形容醜惡不可出仕不得已從所屬保明申乞祠祿後
荷朝廷矜憐特與改秩仍畀職名在某已為非常之遇
今春復荷誤恩遷官進秩某實何人有此僥倖故縷縷
控辭不敢祇拜今茲復冒恩除載念延閣美名容臺清
選雖皆非某所可當然亦必非某祈叩所能竝免持衡
二者之間則延閣之名猶可冒受以養病容臺之屬必
不可偷安而家食矧某自入夏以來不惟舊疾有加老
疾併作腹臟滑泄齒牙動搖日食惟糜粥數匙以上氣

血益衰目昏耳聵視聽不與手足戰掉舉動失常若使
惜不自量勉趨朝列必致顛踣為明時羞除已望闕遙
謝祇受朝奉郎直寶謨閣主管建昌軍仙都觀告劄外
所有新除太常丞省劄見寄留金壇縣省庫擬望鈞慈
察其情之真而不敢為欺哀其命之窮而不可大受特
賜敷奏收還恩命庶或可少延殘生實受造化終始生
全之賜須至申者

第二狀

七月十三日伏準省劄以某辭免新除太常丞恩命奉
聖旨不允某蟻蝨微生叨塵清選實千齡之幸會其敢
喋喋洊瀆鈞嚴自速罪戾而區區之心有不容不盡吐
露者某幼讀論語至伯牛有疾子問之自牖執其手竊
疑再耕聖門高弟益嘗步步亦步趨亦趨情不為不親而
其疾也夫子獨嫌於一顧乃自牖執其手何哉豈非疾
證之彰容貌之改雖聖人亦有所不欲近耶某不幸蚤
迫親養奔走田間皮膚為風毒所乘得疾白駁雖無瘡

痛亦無痛楚而風毒浸淫自頭面達於四體強半變白
形容之惡見者駭異而臣子入朝宜修陞見之恭某疾
證若此其敢扣玉階方寸之地望威顏咫尺之間又某
頃以疾由熱致服涼劑過多歲晚脾泄十日而九手戰
脚弱目昏耳聾實不堪奔走伏望公朝哀矜屢瑣曲賜
奏陳收還誤恩仍畀一祠廟差遣庶幾未填溝壑尚苟
餘生某不勝祈哀請命之至

第三狀 代作不錄

第四狀

昨準省劄以某第二次辭免太常丞除命又準鎮江府備坐省劄津發催促起發某前來供職某雖抱病日久迫於朝命不敢寧居已於九月初二日望闕遙謝祇受太常丞恩命擇十月二十三日一起發赴行在供職回申尚書省至日起發所居金壇縣於二十八日至平江府緣知平江府張殿撰乃某同年進士提舉浙西常平事曹秘丞亦某年家皆有疇昔契分相率迎迓而某識以

病昏神與形離相見之初為贊者所誤遽以曹為張既而兩司合席郊勞即席題名某復誤以曹為薛蓋其精神恍惚如醉如夢故瞶亂如此乃兩司隨行吏兵所共見非敢飾辭若使某不自揣量力疾前邁必顛踣道塗或幸善達亦恐仍前恍惚瞶亂有紊朝儀不但負明時之選且將為頌臺之羞某實不敢除己於次日回舟金壇尋訪醫藥外伏望公朝察其情之真憐其辭之哀特賜敷奏赦其罪戾容其退歸庶幾保全莫景以苟殘生

伏候指揮

第五狀

伏準省劄催趣某疾速前來供職仍具已起發日分申
尚書省某蟣蝨小官累勤朝命震懼不能自寧伏念某
區區之蹟一自去冬奔走赴闕得疾中道即具申聞乞
賜敷奏容令退歸尋準省劄奉聖旨不允給假將理某
時雖自揣疾證已深非可朝夕責效而感激洪造貪慕
明時猶覲殘生未泯勿藥有期或可扶僊支羸一造闕

廷故不敢薦有申控不謂其命分之窮瘥平無日腑臟
泄滑晝夜不止已及半年肢體骨立精神耗散視聽俱
衰又犬馬之齒實已七十筋力亦有不可强者擬望公
朝哀其疾病之深死亡在近特賜敷奏許令守本官致
仕庶免顛踣道路詒笑方來某不勝忍死祈哀俯伏俟
命之至伏候指揮

回王殿院遂宣諭玉音劄子

敬承臺劄宣示玉音知不肖姓名誤塵於簡記意過情

聲聞或契於傳聞致勤天陛丁寧霜臺開曉某退自修
省不任戰兢伏念某少也獨居無師友之益長而為養
惟農圃之依自忝微官即因多病間居三十載恍不知
歲月之更嘉會一千年徒緬想風雲之盛頃游叨於拔
擢其敢昧於稟承而疾弗可為久而益甚自去歲還歸
於中道迄于今偃卧於一床神識昏迷事轉頭而輒忘
關鼎否塞言入耳而不聞重以風虛養成痰厥顛沛而
險易弗顧委頓而饑渴罔知將何以趨殿陛之間對冕

疏之下敢祈敷奏曲赦殘生父教之忠雖自幼不忘於
畝畝天奪之魄竟此身莫望於軒墀

辭免除將作少監第一狀

準省劄六月十一日三省同奉聖旨劉某除將作少監
者伏念某衰孱朽鈍狎被龍光猶有人心寧忘結草啣
環之報第病在肺腑景迫崦嵫勉造闕廷必將中道顛
踣為明時羞昨者殿中侍御史王某宣示王音某已冀
病證托奏知訖不謂猶未徹聞致存叨恩除進貳匠監

皇懼戰慄不知所云謹再瀝血誠歸投大造伏望朝廷
哀矜特賜檢照某累申事理施行所有省劄寄留金壇
縣庫某不敢祇受須至申者

第二狀

伏準省劄以某申乞辭免新除將作少監恩命三省同
奉聖旨不允某竊伏自念一官漫浪了無寸長猥以姓
名徹於造化粵自嘉定改元叨堂審之命寶慶御極冒
藉令之除繼官之陞朝使外贊治於留都祿之真祠使

內通班於延閣以及端平更化又復累被恩除至畧其未嘗身歷朝行遽使之名參匠監譬之犬馬但未顛仆猶當激昂而某三十年間懇懇控辭有同一日儻非病形於外容顏不類於故常病成於內狂易或見之言動則是飾其一時罔上之詞以成其三十年慢上之罪國有明憲某其敢逃伏望公朝察其一語不欺念其餘生無幾特賜敷奏檢會某自去冬以來累申事理容令某守本官致仕實受隆天厚地終始生全之賜須至申聞

者

第三狀

伏準省劄以某疊具辭免新除將作少監恩命閏七月初六日三省同奉聖旨不允疾速前來供職者伏念某蚤歲應舉覓官逐祿州縣非敢矯亢為高實緣肺受風邪形容如鬼不可出仕黽勉退藏聖上登極之初端平更化之日薦叨恩命擢寘周行深原朝廷之意似以其廉退而獎之而其實非其人辭不獲命積負凌兢更沐

殊私俾進貳繕監苟可尚延視息其敢不即欽承有孤
洪造而某自舊歲以來風邪內攻不但形容變改更苦
氣血衰微時一顛仆如小兒驚癇狀今夏至秋此疾已
三作每作非經日不能省事非半月不能起行步履日
艱證狀日惡倘不及尚有知識控露愚忱祈得請於生
前則一旦昏迷填委溝壑必且懷慚於身後是用不懼
么微忍死喋喋干冒鈞嚴伏望哀矜即賜敷奏特與檢
會某累申事理容令守本官致仕須至申聞者

第四狀

伏準省劄以某三具狀申省乞賜敷奏收回將作少監
恩命容令某守本官致仕奉聖旨依累降指揮不允者
某位下官微不應屢控辭免引年致仕亦合從所居府
縣保明具奏不應數以自聞寬大之朝悉加原貸怙終
方命國有常刑竊念某昨所陳賤軀風眩之疾感受已
五六年今歲自四月至七月亦一再發甚者閏七月初
十日因縱步所居敷化里田野間俄爾顛仆比鄰驚異

亟褻子姪掖至卧榻之上昏憤竟夕生意復延今若迫於君命趨造周行萬一旅進朝參斯疾驟至隕越於軒陛之下朝廷始信某言不妄亦已後時謹再具情實控告公朝伏乞俯憐危惘仰瀆聖聰早賜檢會某累狀所申施行庶免如前所述上遺天朝之羞而某視蔭幾何亦遂首丘之願天地大德某之永畢無所報酬倘或未鑒愚誠即乞行下鎮江府金壇縣廉訪某今歲閏七月內疾作事狀一言不實甘伏罔上之誅伏候指揮

第五狀

辭免除直敷文閣知寧國府第一狀

第二狀

辭免除直顯謨閣主管成都府玉局觀一狀

第二狀

辭免令赴行在奏事一狀

并代作不錄

漫塘集卷五